

**Uunga siunnersuut: Uunga siunnersuut: Akileraaruserinermik ingerlatsineq pillugu  
Inatsisartut inatsisaata allanngortinneqarneranik Inatsisartut inatsisaat nr. xx, xx. xxx  
2016-imeersoq**

**(Soraarnerussutisiaqarnissamut aaqqissuussinernik nunanut allanut nuussineq)  
*Aningaasaqarnermut Aatsitassamullu Naalakkersuisumit saqqummiunneqartoq***

**pillugu**

**Aningaasaqarnermut Akileraartarnermullu Ataatsimiititaliap**

**siunnersuutip aappassaaneerreqarneranut**

**ISUMALIUTISSIISUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Jens Imanuelsen, Siumut, siulittaasoq  
Inatsisartunut ilaasortaq Sara Olsvig, Inuit Ataqtigiit, siulittaasup tullia  
Inatsisartunut ilaasortaq Steen Lynge, Atassut,  
Inatsisartunut ilaasortaq Jess Svane, Siumut  
Inatsisartunut ilaasortaq Tillie Martinussen, Demokraatit  
Inatsisartunut ilaasortaq Peter Olsen, Inuit Ataqtigiit  
Inatsisartunut ilaasortaq Aqqaluaq B. Egede, Inuit Ataqtigiit

Ulloq 11. april 2016-imi siullermeerinninnerup kingorna ataatsimiititaliap siunnersuut misissorpaa.

**Siunnersuutip imarisaa siunertaalu**

Soraarnerussutisiaqarnissamut inuunermulluunniit sillimmasiinernik aaqqissuussinernik, soraarnerussutisiaqarnissamut aningaasaateqarfimmit imaluunniit inuunermut soraarnerussutisiaqarnissamulluunniit sillimmasiisarfimmit Kalaallit Nunaanni angerlarsimaffeqartumit Danmarkimut, Savalimmiunut nunanulluunniit allanut nuussinermi akileraarutitigut akitsuu-titigullu isertinneqartut immikkut ittumik nunatta karsianut isertitatut tassungalu atatillugu siunissaq ungasinnerusoq isigalugu aningaasaliissutissanut aningaasaateqarfimmut nuutassatut isigineqarnissaat siunnersuutigineqarpoq.

Siunissaq ungasinnerusooq isigalugu aningaasaliissutissanut aningaasaateqarfiup ilaatigut siunertaraa immikkut ittumik isertinneqartut inuiaqatigiit aningaasarsiornikkut ineriartornerannut naleqquttumik atorneqarnissaannik qulakkeerinnissaq, ilaatigullu akit qaffakkiartupiloorsinnaanerannik pakkersimaarinninnissaq. Aningaasaateqarfiuttaaq taamaattup qulakkiissavaa pisortat ingerlatsinnermut aningaasartuutaasa isertitaagallartut kingunerisaannik ataavartumik amerlinissaat. Immikkut ittumik isertitat taamaalillutik aningaasaliinernut atorneqassapput, nunalu ataatsimut isigalugu ineriartorneq attaneqarsinnaaqqullugu nuna tamakkerlugu pingaarnersiinnermut tamarmiusumut ilanngunneqassallutik.

Aningaasaateqarfiup aningaasaatai immikkoortunut pilersaarutit naapertorlugit Namminersorlutik Oqartussani siunertanut kommuninilu siunertanut atorneqassapput, kommunit pingaarnersiinnermi peqataatillugit.

### **1. Siunnersuutip Inatsisartunit siullermeerneqarnera**

Siunnersuut siullermeerneqarmat **Siumumit, Demokraatinit, Atassummit aammalu Partii Naleqqamit** taperserneqarpoq.

Taama iluseqartillugu siunnersuut **Inuit Ataqaqtiinnit** taperserneqanngilaq, tassa isumaqartoqarmat aningaasaateqarfik pillugu maleruagassat naammattumik nassuiarneqarsimannigitsut.

### **Tusarniaaneq**

Siunnersuutip matuma ataatsimiititaliamit suliarineqarnissaani atugassatut tusarniaanermut akissutit assilinerat ataatsimiititaliamit piniarneqarput. Siunnersuut 2016-imi piffissami 11. januarimiit 27. januarimut ukununnga tusarniaassutigineqarpoq:

Sulisitsisut (GE), NUSUKA, SIK, KANUKOKA, Kommuneqarfik Sermersooq aamma Inuussutissarsiinnermut, Suliffeqarnermut Niuernermullu Naalakkersuisoqarfik

Taamaalilluni siunnersuut ulloq aallartiffik sapaatillu akunnerisa naaneri marluk ilanngullugit ulluni 17-imi tusarniutigineqarsimavoq. Inatsisiliordermi tusarniaanermik ingerlatsinerup Naalakkersuisunit sivikillisaanissaq siunertariinnarlugu akunnequtitut isigineqannginnissaa, taamaalillutillu Naalakkersuisut Inatsisartut ataatsimiinnissaannut tunniussiffissap qanillinera pissutigalugu tusarniaanermut akissuteqarnissamut piffissaliussamik sivikillisisannginnissaat Aningaasaqarnermut Akileraartarnermullu Ataatsimiititaliamit aammaarluni oqaatigineqassaaq. Tamatumunngali taarsiullugu nutaamik inatsisiliornissamut inatsimilluunniit allanguinissamut piffissamik atorneqartussamik aalajangersaanermi Naalakkersuisut peqqissaarussinerullutillu piviusorsiornerusariaqarput. Tusarniaaneq inatsisiliordermi pingaaruteqarlunilu qitiuvoq, tamatuminngalu eqqumaffiginninginneq tamat oqartussaaqataaneranni tunngavinnik inatsisiliordernullu pitsaasuunissaanik saneqqutsinerusinnaavoq.

### **Apeqqutit**

Ataatsimiititaliap siunnersuummik suliarinninnissaanut atugassatut missingersuusiordernermut inatsisip akuersissutigineqarsinnaanera atuutilersinnaaneralu sioqqullugu soraarnerussutisia-

qarnissamut inuunermulluunniit sillimmasiinemik aaqqissuussinernik, soraarnerussutisiaqarnissamut aningaasaateqarfimmit imaluunniit inuunermut soraarnerussutisiaqarnissamulluunniit sillimmasiisarfimmit Kalaallit Nunaanni angerlarsimaffeqartumit Danmarkimut, Savalimmiunut nunanulluunniit allanut nuussinermi akileraarutitigut akitsuutitigullu isertitsissutaasinnaasut qanorpiaq aqunneqalersaarnersut nassuiaatigeqqullugu Aningaasaqarnermut Aatsitassanullu Naalakkersuisoq ataatsimiititaliamit qinnuigineqarpoq. Ataatsimiititaliap apeqqutaasa Naalakkersuisullu akissutaasa assilineqarneri isumaliutissiisummut uunga ilanngussatut ilanngunneqarput.

### **Ataatsimiititaliap siunnersuummik suliarinninera**

Akitsuutini akiliinermi 330 mio. kr.-it pissarsiarineqartussatut missingerneqartut tassaa-sussaasut akileraarutinit isertitassat siuartitat ataatsimiititaliamit maluginiarneqarpoq. Akit-suutinit isertitat maanna pissarsiarineqartut akileraarutinit kingusinnerusukku pissarsiasaagaluit ilagissavaat. Tamanna pissutigalugu ataatsimiititaliap isumaa malillugu aningaasat nunatta karsia aqqutigalugu ungasinnerusumut pilersaarusiornermut ilaatinneqartariaqarput kommunillu isertitassatut annaasaat kommuninut ataatsimoortumik tapiissutit amerlineqarnerat aqqutigalugu taarsiissuteqarfigineqartariaqarlutik.

Naalakkersuisunit erseqqissarneqartutut siunnersuummi matumani qitiusoq tassaavoq soraarnerussutisiaqarnissamut inuunermulluunniit sillimmasiinemik aaqqissuussinernit Kalaallit Nunaanni angerlarsimaffeqartunit nunanut allanut nuussinermi akitsuutitigut isertinneqartut *siunissaq ungasinnerusoq isigalugu aningaasaliissutissanut* aningaasaateqarfimmut nuunneqarnissaat.

Aningaasaateqarfik pillugu Naalakkersuisut allapput:

*“Siunissaq ungasinnerusoq isigalugu aningaasaliissutissanut aningaasaateqarfiup ilaatigut siunertaraa immikkut ittumik isertinneqartut inuiaqatigiit aningaasarsior-nikkut ineriartornerannut naleqquttumik atorineqarnissaannik qulakkeerinissaq, ilaa-tigullu akit qaffagiartupiloorsinnaanerannik pakkersimaarinninnissaq. Aningaasaate-qarfiutaaq taamaattup qulakkiissavaa pisortat ingerlatsinermut aningaasartuutaasa isertitaagallartut kingunerisaannik ataavartumik amerlinissaat. Immikkut ittumik iser-titat taamaalillutik aningaasaliinernut atorineqassapput, nunalu ataatsimut isigalugu ineriartorneq attaneqarsinnaaqqullugu nuna tamakkerlugu pingaarnersiunermut tamarmiusumut ilanngunneqassallutik. Aningaasaateqarfiup aningaasaatai ingerlata-qarfinnut pilersaarutit naapertorlugit Namminersorlutik Oqartussani siunertanut kommuninilu siunertanut atorineqassapput, kommunit pingaarnersiunermi peqataa-tillugit.”*

Siunissaq ungasinnerusoq isigalugu aningaasaliissutissanut aningaasaateqarfiliornissamik eqqarsaammut tunuliaqutaasoq ataatsimiititaliamit maannangaaq taparserneqarsinnaavoq. Matumani siunnersuutigineqartutut soraarnerussutisiaqarnissamut inuunermulluunniit sillim-

masiineramik aaqqissuussinernit nuussanit immikkut isertitat kisiisa pinnagit, aammali pigisanik nalilinnik tunisinermi ataasiartumik isertitat kiisalu assersuutigalugu aktiaatinit immikkut iluanaarutinit imaluunniit misileraalluni aalisarnermit isertitaajunnartut allat aningaasaateqarfimmi taamaattumi katersorneqarsinnaapput. Naalakkersuisut oqaatigisaattut aningaasaateqarfiup taamaattup qulakkiissavaa pisortat ingerlatsinermit aningaasartuutaasa isertitaagallartut kingunerisaannik ataavartumik amerlinnginnissaat.

Aningaasat immikkut isertitat aningaasaateqarfimmut nalinginnaasumik nuunneqartarnissaat qulakkeerniarlugu aningaasanut inatsimmi iliuusissat qanoq ittut ingerlanneqassanersut tassunga atatillugu isumaliutigineqarsinnaavoq. Tassunga assersuutaasinnaavoq ”Konto pingarneq 10.13.10, iluanaarutit, aktianik piginneqatigiiffinniit piginneqataassutit tunisinerillu”, tassunga ikineqartarlutik nunatta karsiata isertitai iluanaarutinit, aningaasaatinik appaanikkut tunniussinernit aamma aktianik tunisinernit isertitatut aammalu isertitaasinnaasutut allatut Namminersorlutik Oqartussat aktiaateqarluni ingerlatseqatigiiffinni tamakkiisumik ilaannakortumilluunniit piginneqataaneratigut pissarsiarineqartut. Taamaalillunilu isertitap qanoq ilisukkut immikkut isertitatut isigineqarsinnaanerata erseqqissumik nassuiaasiorneqarnissaa sulissutigineqartariaqarpoq.

Siuliani allassimasunut tunngatillugu ataatsimiititaliap isumakuluutigilaarlugu paasivaa missingersuusiornermit inatsisip, taamaalillunilu aamma siunissaq ungasinnerusoq isigalugu aningaasaliissutissanut aningaasaateqarfimmik pilersitsinissap, aappassaaneerneqarnissaata pingajussaaneerneqarnissaatalu 2016-imi ukiakkut ataatsimiinnissamut kinguartinneqarnissaa Naalakkersuisut qinnutigigaat. Tassunga atatillugu missingersuusiornermit inatsisip akuersissutigineqarsinnaanera atuutilersinnaaneralu sioqqullugu soraarnerussutisiaqarnissamut inuunermulluunniit sillimmasiineramik aaqqissuussinernik, soraarnerussutisiaqarnissamut aningaasaateqarfimmit imaluunniit inuunermut soraarnerussutisiaqarnissamulluunniit sillimmasiisarfiimmit Kalaallit Nunaanni angerlarsimaffeqartumit Danmarkimut, Savalimmiunut nunanulluunniit allanut nuussinermi akileraarutitigut akitsuutitigullu isertitsissutaasinnaasut qanorpiaq aquneqalersaarnersut nassuiaatigeqqullugu Naalakkersuisut ataatsimiititaliamit qinnuigineqarput.

Naalakkersuisut akipput:

*”Taamak pisoqartillugu iluanaarutit nunatta karsianut ilaassapput, kontomut pingarnermit 20.11.22 Isertitat Allatnut nakkarnissai naatsorsuutaavoq. Takorloorneqarsinnaavoq tasannaanniit mittarfinnut aktianik piginneqatigiiffimmut pilersinneqartussamut aningaasat nuunneqarnissaat Naalakkersuisut qinnuteqassasut, qinnuteqaat tamanna pillugu ataatsimiititalip paarisaa malillugu.”*

Tamanna ataatsimiititaliamit tusaatissatut tiguneqarpoq, tassungali atatillugu aningaasat siunissaq ungasinnerusoq isigalugu aningaasaliissutissanut aningaasaateqarfimmut siuliani nassuiaatigineqartut isertitaasimasutut sapinngisamik annertunerpaamik aqutsivigineqar-

nissaat pingaaruteqarmat erseqqissaatigineqassaaq. Tassa nuna ataatsimut isigalugu attanneqarsinnaasumik ineriartortitsinissaq qulakkeerniarlugu nuna tamakkerlugu ataatsimoortumik pingaarnersiuiineq tunngavigalugu aningaasaliinernut. Aningaasalli pisortat ingerlatsinermut aningaasartuutaasa amerlinerannik nassataqassanngillat.

Aningaasaateqarfik qanoq aaqqissuussaallunilu aqutsivigineqalersaarnersoq ataatsimiititaliamit paaserusunneqarpoq. Siulersuisunik ulluinnarnilu aqutsisunik toqqaasarnermi periutsit kiisalu aningaasaateqarfiup sulinerata aningaasanillu atuinerata ersarissuunissaat qanoq qulakkeerniarneqarnersoq ataatsimiititaliamit matumani immikkut eqqarsaatigineqarput. Immikkoortup aappassaaneerneqarnerani apeqqutit taakku akeqqullugit Naalakkersuisut qinnuigineqarput.

### **Siunnersuutip aningaasaqarnikkut kingunerisassai**

Siunnersuutip piviusunngortinneqarnerani aningaasatigut kingunerisassat siunnersuummut nalinginnaasumik nassuiaatini nassuiaatigineqarput. Tunngavissat pigineqartut tunngavigalugit siunnersuummi saqqummiunneqartunit allaanerumsumik naliliinissamat ataatsimiititaliaq tunngavissaqarsorinngilaq.

### **6. Ataatsimiititaliap inassuteqaataa**


Tamanna tunngavigalugu **Aningaasaqarnermut Akileraartarnermullu Ataatsimiititaliami amerlanerussuteqartut Siumup, Demokraatit Atassutillu ilaasortaataa inassutigaat** siunnersuut Inatsisartunit akuerineqassasoq.

### **Aningaasaqarnermut Akileraartarnermullu Ataatsimiititaliami ikinnerussuteqartut Inuit Ataqtigiit ilaasortaataa ikinnerussuteqarluni oqaaseqaat imaattoq saqqummiuppaat:**


Soraarnerussutisiaqalernissamat ileqqaakkat siusinaartumik tiguneqarneranni akileraarutaa-sartup nunatta karsianut kommunillu karsianut nakkartinneqartarsimagaluartut, nutaamik inatsisiliornikkut taamaallaat nunatta karsianut nakkartinneqartalernissaannik siunertaq Kommunit ilaanniit isumaqatigineqanngilaq annaasaqaateqarnissartik aarleqqutigigamikku. Inuit Ataqtigiit kommunit taamatut annaasaqarnissaminnik aarleqqutteqarnerat paasilluarlutigu qulaajaasoqarnissaa kissaatigisimagaluarparput, tamannali pinngitsoorsimavoq. Tamanna tunngavigalugu aammalu imm. 25-ip imm. 21-mut, aappassaaneerneqarnissaata ukiamut kinguartinneqarnissaanik piunasaqaateqarfigisimasatsinnut attuumassuteqartutut isigigatsigu Inuit Ataqtigiinniit imm. 25 itigartipparput.

Tamanna tunngavigalugu **Aningaasaqarnermut Akileraartarnermullu Ataatsimiititaliami ikinnerussuteqartut Inuit Ataqtigiit ilaasortaataa inassutigaat** siunnersuut Inatsisartunit itigartinneqassasoq.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.



Jens Immanuelson,  
siulittaasoq




Aqqaluaq B. Egede,  
siulittaasup tullia



Jess Svane



Steen Lynge



Tillie Martinussen



Peter Olsen



Sara Olsvig